

Goibekokale

ELGETA / Barikua / 2005eko uztailaren 8a / 235. zenbakia

KOORDINATZAILEA: Irati Agirreazaldeggi • Barrenkalea 33 BERGARA 20570 • Tel.: 943 76 03 97 • Faxa: 943 76 29 77 • Posta elektronikoa: goibekokale@goiena.com • Lege gordailua: 55475/95

Ordu aldaketak garraio zerbitzu publikoan

IRATI AGIRREAZALDEGI

Uztailean ordutegia aldatuko dute Elgeta-Bergara-Arrasate ibilbidea egiten duten autobus zerbitzuetan. Gainera, udan barrena zerbitzua taxi bidez eskainiko du Udalak. Hala ere, bidaiari txarretan eta geltokietan ez da inolako aldaketarik izango.

Ikasturtean zeharreko autobus zerbitzurako Foru Aldundiaren laguntza jaso zuen Udalak; baina orain osorik ordaindu behar du zerbitzu hori.

Azterketa egin eta ikusi dute hainbat orduan zerbitzua kentzea eta beste ordu batzuetan ipintzea dela egokiena, erabiltzaileen eskarien arabera; eta hala egin dute.

Ondorioz, Elgetatik Bergarara bitarteko ibilbidea egiteko garraio zerbitzua 07:40an, 11:45ean eta 13:30ean egongo da udan. 11:45ekoa, gainera, Arrasateraino joango da. Bergaratik

Elgetarako bidea egiteko, berriz, 11:30ean eta 13:15ean egongo da zerbitzua.

Beraz, orain arte Bergaran 14:40an irteten zen Elgetarako autobusa eta Elgetan 14:55ean irten eta Bergarara joaten zena kendu egin dituzte. Haien ordez Bergaratik Elgetara 13:15ean egongo da taxia eta Elgetatik Bergarara, berriz, 13:30ean.

TAXIA

Orain arte autobus bidez eskaintzen zen zerbitzua orain taxi bidez egingo dute. Izan ere, bi eta lau erabiltzaile artean bakarrik dituzte zerbitzuok eta Udalean azterketa egin ondoren ikusi dute merkeagoa dela taxia ipintzea autobusa baino.

Erabiltzaileendako ez da aldaketarik izango bidaiari txartelen prezioan. Bidaiari bakoitzeko euro bat ordaindu beharko dute bidaiariak. Bonua dutenek, berriz, 90 zentimo. Geltokiak ere mantendu egingo dira: Bergaran, anbulatorioan eta 11:45ean irten eta



Orain arte autobusez eskainitako zerbitzua uztailean eta irailean taxi bidez egingo dute.

Arrasatera doan taxia Arrasateko anbulatorioaraino joango da.

Uztailean barrena taxi zerbitzu hori eskaini ostean, abuztuan etena egingo dute, eta irailean berriz ere izango da abian.

Hala ere, oraindik erabaki-

tzeke dago irailetik aurrera nola egingo duten garraio zerbitzua. Hasieran taxi bidez egin arren, baliteke aurrerago aldatzea. Izan ere, ikasleak eskolan hasten direnean erabiltzaile kopuruak gora egingo du garraio zerbitzu horre-

tan; eta horri irtenbideren bat eman beharko dio Udalak. Orain taxia autobusa baino merkeagoa izan arren, ikasleekin taxi gehiago beharko lirateke eta horrek kostua igoko luke.

Bihurguneak konponduta

Bergaratik Elgetarako errepidean Uberako eta Arantzetako bihurguneak konpondutzeko lanetan jardun ostean, ibilgailuak normaltasunez pasa daitezke bertatik. Bihurguneen zabalera handitu egin dute hainbat ibilgailu trabatuta gelditzen baitziren. Orain, trafiko seinalak eta biondak ipintzea eta erremateak egitea baino ez da falta. Udaletik esan digute espero dutela uztailaren 15erako lanak amaituta egotea; eta beranduenez hilaren 22rako eginda egongo direla./I.A.


LABUR

Kirola dinamizatzeko taldearen batzarra astelehen arratsaldean kultura etxean

Kirola dinamizatzeko egitura egonkorra sortzeko asmoz hainbat bilera egin dituzte herrian eta beste batzar baterako dei egin dute orain. Bilera uztailaren 11n, astelehenean, izango da, 19:30ean, kultura etxean. Herriko kirolari eta kirolzale guztiak daude deituta batzarrerara. Bertan zehaztu nahi dute urteko azken lau hilabeterako kirol programa: jarduerak, antolaketa eta funtzionamendua, besteak beste.

Udaletxea goizez bakarrik egongo da zabalik irailean bitartean

Udako ordutegiarekin dihardute lanean udaletxean. Irailean bitartean 08:00etatik 14:30era arte egongo dira langileak udaletxean. Beraz, udaletxean gestioak egin nahi dituztenek kontuan hartu behar dute arratsalde itxita egongo dela. Bestalde, jakinarazi digute abuztuaren 6tik aurrera udaletxera joaten direnek txirrina jo beharko dutela sartu ahal izateko. Izan ere, langile bakarra egongo da bertan eskari guztiei erantzuteko.



JAIK

Azoka Nagusiaren ostean pozik herritarren parte-hartzearekin

I.A.

Azoka Nagusiko jaiak izan ziren joan zen asteburuan, eta jai batzordeak antolatutako ekitaldiez gozatzeko aukera izan zuten elgetarrek zein kanpotik bertara joandakoek. Antolatzaileak pozik azaldu dira, emanaldiak ongi atera direlako.

Jaiak amaituta antolatutako gauza gehienak espero bezala joan direnez, pozik daudela esan digu Udaleko Kultura teknikariak. Hala ere, badute pena bat, jaiak ezin izan zituztelako uste bezain ongi amaitu. "Jaiak amaitzeko antzerki saioa genuen iragarrita, baina euria zela eta bertan behera gelditu zen emanaldia. Eszenatokia plazan gertatzeko bost ordu behar izan zituzten eta ezinezkoa zen azken unean dena beste leku batera aldatzea", esan digu Enrike Gorrotxategik.

Gainontzean dena ongi joan da, "nahiz eta azken urteetan bezala gauetan plazako dantzaldietan jende gutxi ibili den".

Jaiak ongi joan arren izan da ezbehar txikirik ere. Zezenetan zein herri jolasetan jausi eta zauriak izan dituzte bi herritarrek.

ZAPATU EGUERDIKO GIROA

Zerbait azpimarratzekotan zapatu eguerdian plaza inguruan egon zen giroa aipatu digu Enrikek. "Asto karrerarekin hasi eta arratsaldeko jokoetara bitartean jende asko elkartu zen plaza bueltan. 400 lagunendako gertatutako pae-



GOIENKARIA

Zapatuko herri jokoetan jende askok hartu zuen parte.

lla bukatu egin zen, nahiz eta batzuek errepikatu ere egin zuten; eta jokoetan herritar askok hartu zuen parte".

Domekako azokak ere jende asko ekarri zuen Elgetara. "Aurtengoan, urteurrena zenez, aurrez iragarri da azoka eta horrek jendea gerturatzea eragin du".

GAZTETXEKOAK ERE POZIK

Jaietan gaztetzearan ere egon da ekitaldirik. Kontzertuetara jende

asko joan da, baita trikipoteora ere. Gaztetzekoak pozik azaldu dira jendearen erantzunarekin: "Batez ere jende artean sortu den giro polita azpimarratuko genuke", esan digute.

Oraindik jai batzordeak ez du aurtengo jaien gaineko gorabeherak aztertzeko bilerarik egin, baina gauzak nola joan diren gainbegiratu dute zer errepika daitekeen eta berriz zer ez egin erabakitzeko.

KULTURA

Antzerkia gaur gauean Espaloian

I.A.

Gaur, barikua, uztailak 8, *Nora hoa, neska?* antzezlan eskainiko du Txirena antzerki taldeak Espaloia Kafe Antzokian, 22:30ean. Lierni Fresnedok zuzendutako obra horretan, Edurne Agirrezabalak eta Begoña Amonarrirek jardungo dute aktore lanetan.

Umorezko komedia izango da, gaur egungo emakume askoren egoera islatzen duena.

Hogeitazekoz egon ondoren senarrarengandik banandu den Peparen bizitza kontatzen du. Pepak ezin du sinetsi bere bizitzarekin zer egin duen: lana bertan behera utzi zuen, senarrari atsegin ematearren,

eta, orain, atzera begiratu eta ohartzen da antzezle-lanean jarraitu izan balu bere bizitza zein desberdina izango zatekeen. Baina, etsipenak hartuta dagoela dirudien unean, Pepa alai berpiztuko da, galdutako denbora berreskuratzeko prest.

Udalak antolatu eta Kutxak lagundutako emanaldia izango da gaurkoa.

ZINEMA

Antzerkia ez ezik zinema saioak ere izango dira Espaloian. Ohiko egun eta orduan zineklubeko emanaldiak egongo dira uztailean barrena; eguaztenetan 21:30ean. Uztailaren 14an, Espainiako gerrarekin lotutako film bat emango dute: *Fiesta*. Pierre Boutronek zuzendutako drama frantsesa da.



GOIENKARIA

Egungo emakume askoren egoera islatuko du gaurko antzerkiak.

KIROLA

Berasaluze eta Idoate lau t'erdiko txapelaldun

I.A.

Ibilbide luzearen ostean, bariku gauean Udal Pilotalekuan jokaturako finalekin amaitu zen aurtengo ETB-Kantxa lau t'erdiko pilota txapelketa. 23 urtez azpikoe-tan Berasaluze berriztarra izan zen txapelaldun; kadeteetan, berriz, Idoate burlatarra.

Datorren astean berritze lanetarako prestatzen hasiko dira Udal Pilotalekua. Bitartean pilotalekua baino pilotariak izan dira albiste. Izan ere, barikuan, frontoia beteta zela, ETB-Kantxa txapelketako finalak jokatu ziren.

Kadete mailako finalean Mikel Idoate burlatarra izan zen txapelaldun Aitor Mendizabal antzuolarrari 22-16 irabazita. Bi ezkertien arteko borrokan nafarra gehiago izan zen fisikoki, eta Mendizabalendako ez ziren nahi-

koak izan Antzuolako animatzaileen oihuak txapelketa bikaina egin duen Idoateri aurre egiteko.

Asier Berasaluze berriztarrek 22 eta 7 irabazi zuen 23 urtez azpikoen finala Lizarrako Pablo Urri-zelkiren aurka. Berasaluzeren sakeak mina egin zion Urrizelkiri; eta finala oso azkar amaitu zen inolako emoziorik gabe.

ANTOLATZAILEAK GUSTURA

Finalean pilotalekua beteta ikusita eta txapelketak izan duen maila onari begiratu pozik daude antolatzaileak.

Pilotalekua konpontzen hasiko direnez, datorren urtean txapelketa non egingo duten galdetu diogu Juan Luis Uberari. Honen esanetan, "Elgetan bertan izango da. Udaletxetik agindu digute martxorako lanak amaituta egongo direla".



GOIENKARIA

Mendizabal antzuolarrak ez zuen Idoate burlatarra gainditu kadeteen mailan.

LABUR

Abuztuaren 23ra arteko epea uraren zerga ordaintzeko

Gipuzkoako Ur Partzuergoak elgetarrei jakinarazi nahi die ekainaren 24an hasi zela eta abuztuaren 23ra bitarteko epea izango dutela urari, arazketari, saneamendu planari eta zaborrari dagozkion ordainagiriak ordaintzeko. Urteko bigarren hiruhilabeteko zerga ordaindu beharko dute epe horretan. Bestalde, zehaztu dute ordainagiriaren gaineko erreklamazioak aurkezteko azken eguna uztailaren 24a izango dela. Epea pasatu ostean, borondatez ordainketa egin ez duten zergapekoei ur hornidura eten egingo dietela ohartarazi dute partzuer-gokoek. Bestalde, gogorarazi dute ordainketa aurrezki kutxa baten bitartez egin behar dela.